

PRIJAVA ZA FOND ZA DIGITALNU PRAVDU

Hvala vam što se zanimате za Fond za digitalnu pravdu!

Svjesni smo da zna biti teško snalaziti se među kriterijima finansijera i u procesima prijavljivanja (i sami smo to doživjeli!) pa smo zato pripremili ovaj vodič da bismo to sve jasno i transparentno predstavili.

Ako vam nešto i dalje bude nejasno nakon čitanja, možete nas kontaktirati putem emaila digitaljusticefund@weavingliberation.org.

U ovom vodiču ćete pronaći:

- 1. Osnovne informacije o fondu**
- 2. Kriterije za finansiranje**
- 3. Način prijave**
- 4. Često postavljana pitanja**

**WEAVING
LIBERATION**

1. Osnovne Informacije o Fondu

Weaving Liberation je inicijativa za izgradnju ekosistema i regrantiranje, usmjerena na podršku i osiguravanje resursa za organiziranje u oblasti digitalne pravde. Koordiniramo provedbu [Vizije organiziranja za digitalnu pravdu u Evropi](#), odnosno programa aktivnosti koje će doprinijeti stvaranju uslova da zajednice rade na ostvarivanju oslobađajućih digitalnih budućnosti. Radimo na sljedećem:

Podržavamo pokrete da rade zajedno i podržavaju jedni druge u izgradnji pozitivnih vizija digitalne pravde

Razvijamo prakse koje afirmiraju život kako bismo stvarali promjene u donošenju politika, zagovaranju, parničanju, organiziranju, itd.

Redistribuiramo resurse grupama koje se bave rasnom, antikastinskom, ekonomskom, okolišnom, transfeminističkom, queer i migrantskom pravdom i pravdom za osobe sa invaliditetom, kao i grupama koje se bave digitalnom pravdom, a djeluju na sjecištu tehnologije i pravde.

Ovo sve primarno ostvarujemo kroz partnerstva sa drugima, gdje zajednički osmišljavamo prostore za okupljanje kao što su naši [Knowledge and Imagining Retreats](#) (Okupljanje usmjereno na razmjenu znanja i zamišljanje) i [Digital Liberation Retreat](#) (Okupljanje na temu digitalnog oslobođenja), razvijamo i dijelimo [resurse o ključnim pitanjima digitalne pravde](#); dodjeljujemo grantove kao jedan od načina redistribucije i bavimo se općim zagovaranjem prema privatnoj filantropiji da bismo jačali argumentaciju za [digitalnu pravdu](#), zajedničko djelovanje višestrukih pokreta i [pravdu u resursima](#)

Zašto fond?

Fond za digitalnu pravdu ima kao cilj njegovanje ekosistema u kojem grupe koje se opiru nasilnim tehnološkim štetama i zamišljaju kultiviranije odnose sa tehnologijama imaju resurse koji su im potrebni da sanjaju, da se organiziraju, da se grade i napreduju ka oslobađajućim digitalnim sadašnjostima i budućnostima.

Međutim, upravo te grupe imaju malo resursa i gotovo da se nemaju kome obratiti za fleksibilnije finansiranje jer brojne vlade trenutno investiraju milione u tehnološko-industrijski kompleks, dok filantropska sredstva za tehnološka pitanja često odlaze na reaktivne pristupe usmjerene na odbranu marginalnih promjena, umjesto na sistemski rad orijentiran na promjene. Ovaj fond je osmišljen da ublaži taj jaz.

Naša vizija je ekosistem u kojem ove grupe mogu svoj posao raditi pod vlastitim uslovima, otići dalje od pružanja otpora i reagiranja na štete, sa resursima koji im daju prostor za zamišljanje i izgradnju moći za bolje sadašnjosti i budućnosti. Mi ovaj ekosistem vidimo kao mjesto na kojem su pokreti za pravdu u solidarnosti i gdje se organiziraju, sanjaju i zajednički grade da bi osigurali da svrha, dizajn, razvoj, upotreba i upravljanje tehnologijama budu ukorijenjeni u pravdi i usmjereni ka našem kolektivnom oslobođenju.

Više o tome kako mi razumijemo digitalnu pravdu možete naći u [Viziji organiziranja za digitalnu pravdu u Evropi](#).

Zašto participativan pristup?

Radimo ovo svjesni ograničenja filantropskog obezbjeđivanja resursa, kao i pristupa finansiranja odozgo ka dolje kojima se ne ispunjavaju potrebe onih na koje tehnologija najnegativnije utiče. U mnogim slučajevima, takve prakse finansiranja nanose dodatnu štetu jer se njima podržavaju strategije i rješenja koja ne uzimaju u obzir probleme i rješenja onih koji se u svakodnevnom životu suočavaju sa najtežim posljedicama tehnološko-industrijskog kompleksa.

Iako je participativno finansiranje daleko od savršenog, ono nastoji redistribuirati moć dok redistribuiraju resurse, da bi se omogućio veći pristup finansiranju grupama koje su često strukturno isključene. Za nas je u ovome ključno da se odlučivanje o raspodjeli finansiranja povjerava našoj Peer Circle grupi (krugu ravnopravnih članica i članova) – koja broji 10 osoba sa znanjem i iskustvom u radu i organiziranju u oblastima digitalne pravde, pravde za osobe sa invaliditetom, radničkih prava, rasne pravde, antikastinske pravde, prava Romkinja i Roma, queer i transfeminističke pravde, kao i u mnogim drugim oblastima. **Ljudi iz pokreta odlučuju o tome gdje će novac za pokret biti usmjeren.**

Ovaj fond ne počinje od nule. Inicijativa Weaving Liberation rezultat je kolektivnog napora započetog 2020. godine kada je preko 30 partnera učestvovalo u osmišljavanju programa pod nazivom Vizija organiziranja za digitalnu pravdu u Evropi, kojim je utvrđena potreba za radikalnim praksama finansiranja kako bi se stvorili uslovi pod kojima grupe mogu pružiti otpor strukturnim tehnološkim štetama i razvijati oslobađajuće alternative.



Također smo zahvalni na radu, podršci i solidarnosti drugih posredničkih fondova koji radikalno ponovno zamišljaju osiguravanje resursa na terenu, a među njima su Black Feminist Fund, Dalan Fund, Numun Fund, Guerrilla Foundation, Collective Abundance, Green Screen Coalition, kao i brojni drugi.

Zahvalni smo na podršci Ford Foundation, Luminate, i Oak Foundation u obezbjeđivanju resursa za ovaj pilot krug Fonda za digitalnu pravdu.

2. Kriteriji za Finansiranje

Ko se može prijaviti?

Fond je namijenjen neprofitnim inicijativama – registriranim i neregistriranim grupama, kolektivima i nevladinim organizacijama koje djeluju u oblasti organiziranja za digitalnu pravdu u Evropi (prema [definiciji](#) Vijeća Evrope).

Uslovi za učešće

Da biste se mogli prijaviti za Fond i imali dobre izgleda za dobijanje granta, potrebno je da ispunjavate sve ove kriterije:

- **Vaša grupa mora djelovati u Evropi, a fokus vaših aktivnosti također mora obuhvatati Evropu.** Rad u koaliciji sa grupama koje djeluju međunarodno se rado prihvata.
- **Vaš rad mora biti usmjeren na organiziranje u oblasti digitalne pravde.**
- **Vaš godišnji organizacijski budžet ne smije prelaziti prosjek od 500.000 EUR** (računato za posljednje dvije ili tri godine).
- **Nemate više od 10 plaćenih zaposlenih osoba (što uključuje dugoročne freelance ugovore).** Grupe koje u potpunosti vode volonteri, kao i kolektivi bez plaćenog osoblja, također se ohrabruju da se prijave.
- **Vašu grupu predvodi zajednica.** To znači da su osobe koje su direktno pogođene pitanjima kojima se bavite uključene u vaše rukovodstvo ili u procese donošenja odluka i provedbu vaših aktivnosti.

Organiziranje u oblasti digitalne pravde definiramo kao rad koji gradi kolektivnu moć u cilju pravednog pristupa resursima za sve i stvara uslove da planeta i sva živa bića napreduju – što uključuje i omogućavanje historijski i strukturno isključenim zajednicama da samostalno odlučuju o svrsi, dizajnu, razvoju, primjeni i upravljanju digitalnim tehnologijama.

Koga želimo financirati

Svjesni smo da pokreti u različitim kontekstima imaju vlastite načine definiranja digitalne pravde, te smo našu definiciju namjerno postavili široko kako bismo omogućili grupama da same definiraju svoj rad. U nastavku dajemo dodatni kontekst o perspektivama digitalne pravde koje želimo podržati:

- Grupe koje vode historijski i strukturno isključene i marginalizirane zajednice (npr. crne i autohtone osobe, rasijalizirane osobe, osobe koje trpe kastinsku diskriminaciju, osobe stavljene u manjinski položaj po osnovu roda, queer osobe, osobe s invaliditetom, zakupci, zatvorenici, radnici i radnice općenito, seksualni radnici i radnice, migranti i migrantice, siromašne osobe, osobe bez zemlje, mladi, starije osobe, raseljene osobe, osobe koje se opiru kolonijalnoj okupaciji, ratu i/ili genocidu, etničke ili vjerske grupe suočene sa marginalizacijom, mali poljoprivrednici itd.)
- Grupe koje imaju razumijevanje digitalne pravde utemeljeno na propitivanju i razgradnji dominantnih struktura moći i sistema opresije koje digitalne tehnologije omogućavaju i dodatno pojačavaju (npr. kolonijalizam, naseljenički kolonijalizam, rasizam, kapitalizam, kapitalistički ekstraktivizam, kastinski sistem, ableizam, cis-hetero-patrijarhat itd.)
- Grupe koje grade kolektivnu moć sa ciljem postizanja sadašnjosti i budućnosti koje afirmiraju život i oslobođenje, pri čemu pod tim podrazumijevamo one u kojima su tehnologije sredstvo regeneracije, obilja, brige i samoodređenja.

Rad koji želimo financirati

Ovaj spisak nije iscrpan, već predstavlja vodič za vrste rada koje želimo podržati:

- **Izgradnja i održavanje zajednica oko pitanja digitalne pravde:** organiziranje u zajednici, međusobna (peer-to-peer) podrška, aktivnosti usmjerene na izgradnju odnosa itd.
- **Jačanje znanja i kapaciteta:** popularno i političko obrazovanje, istraživačko novinarstvo, razmjena vještina, mapiranje problema (npr. tehnološke štete, potrebe i želje zajednica), razvoj oslobađajućih narativa o tehnologiji, umjetničke intervencije i drugi kreativni pristupi itd.
- **Izgradnja koalicija i pokreta:** zagovaranje, strateško parničenje, kampanje itd.
- **Međusobna pomoć povezana sa tehnologijom:** krugovi za popravku tehnologije, međusobna podrška u oblasti digitalne sigurnosti i zaštite, zajedničke tehničke infrastrukture za rad pokreta, inicijative za dijeljenje softvera i hardvera itd.
- **Rad na tehnologiji koji afirmira život:** prototipiranje, pilotiranje ili širenje tehnologija usmjerenih na zajednicu, transfeminističkih i antikolonijalnih tehnologija itd.

Svjesni smo da se mnoge od ovih aktivnosti i pristupa preklapaju; ovi primjeri služe da potaknu ideje, a ne da ograniče mogućnosti finansiranja.

Šta ne financiramo

- Rad koji se primarno odvija izvan Evrope ili obuhvata aktivnosti su usmjerene na djelovanje izvan Evrope
- Velike organizacije koje već imaju značajnu podršku trustova, fondacija ili pojedinaca visoke neto vrijednosti
- Posredničke organizacije čija je uloga daljnja dodjela sredstava (regrantiranje)
- Organizacije koje su osnovale vlade
- Univerzitete
- Lokalne ogranke dobro financiranih domaćih ili međunarodnih organizacija
- Grupe čiji korisnici nisu zastupljeni u njihovom rukovodstvu, donošenju odluka ili provedbi aktivnosti
- Političke stranke ili grupe povezane sa političkim strankama

Kako finansiramo

Koji iznos možete tražiti?

Grupe se mogu prijaviti za grantove u iznosu od 10.000 do 50.000 EUR, za period do dvije godine. Svjesni smo da su politike i prakse finansiranja dovele do toga da grupe (posebno grassroots inicijative i grupe koje vode osobe crne ili tamnije boje kože) traže manja sredstva nego što im je zaista potrebno, stoga vas ohrabujemo da prilikom prijave razmišljate šire o svojim potrebama za resursima.

Koliko je ukupno sredstava dostupno?

U ovom krugu Fond će raspodijeliti ukupno 500.000 EUR za grantove koji će se koristiti u periodu 2026–2028.

Možemo li se prijaviti za drugi grant ili produženje?

S obzirom na to da je ovo naš prvi krug finansiranja, trenutno ne možemo potvrditi mogućnosti produženja u budućnosti. Nadamo se nastavku Fonda u narednim godinama i podijelit ćemo sve informacije kada to budemo mogli.

Kako se donose odluke?

Sve odluke o finansiranju donosi naša Peer Circle grupa. Oni su učestvovali u oblikovanju djelokruga, procesa i pristupa našeg participativnog modela finansiranja. Deset članica i članova Peer Circle grupe posjeduju znanje i iskustvo iz rada i organiziranja u oblastima digitalne pravde, pravde za osobe s invaliditetom, radničkih prava, rasne pravde, antikastinske pravde, prava Romkinja i Roma, queer i transfeminističke pravde, kao i mnogih drugih područja.

3. Način prijave

Portal za prijem prijava otvoren je od sedmice koja počinje 11. maja do 21. juna 2026. godine.

Korak 1. Registracija na platformi za grantove

Prvi korak u procesu prijave je da se registrirate na platformi za grantove, što radite odgovaranjem na nekoliko jednostavnih pitanja:

- Naziv vaše organizacije
- Vaši kontakt podaci
- Način osnivanja organizacije (npr. da li ste registrirana neprofitna/nevladina organizacija, radnička zadruga ili neregistrirani kolektiv/grupa iz zajednice)
- U kojoj ste državi smješteni?
- Da li ćete prijavu podnijeti u pisanoj formi putem online platforme ili slanjem video-prijave putem emaila

Nakon registracije, primit ćete obavijest sa adrese techsupport@digitalfreedomfund.org da možete započeti rad na svojoj prijavi.



Rok za registraciju na platformi za grantove je nedjelja, 24. maj 2026. godine do 23:59 CET

Korak 2. Podnošenje prijave putem platforme za grantove, što radite odgovaranjem na sljedeća pitanja:

1. **Osnovne informacije o vašoj grupi** – ova pitanja nam pomažu da procijenimo da li ispunjavate uslove za fond
 - a. Kada i kako je grupa osnovana?
 - b. Koliki je vaš prosječni godišnji prihod? (prosjeak za posljednje 2–3 godine)
 - c. Koliko imate plaćenih zaposlenih osoba?
 - d. Koja je misija i vizija vaše grupe?
 - e. Na koji su način osobe koje su najviše pogođene pitanjima kojima se bavite zastupljene u rukovodstvu, donošenju odluka i provedbi aktivnosti grupe?

2. **Vaš rad** – ova pitanja nam pomažu da shvatimo kako se bavite organiziranjem u oblasti digitalne pravde, kako vaša grupa funkcioniira i šta planirate uraditi sa grantom
 - a. Za koji rad tražite finansiranje?
 - b. Koji je geografski obuhvat tog rada?
 - c. Na koji način je vaš rad povezan sa pitanjem digitalne pravde?
 - d. Zašto želite da to radite? Koji su vaši ciljevi?
 - e. Ko će obavljati taj rad? Molimo navedite i druge grupe ili kolektive koji bi mogli biti uključeni.
 - f. Na koji način vaša grupa njeguje brigu? Navedite primjere kako uključujete brigu, dobrobit, pristupačnost ili podršku zajednici u svoje organiziranje, donošenje odluka ili svakodnevni rad.

3. Vaš budžet – ovo nam pomaže da shvatimo vaše potrebe za finansiranjem

Smjernice:

- Molimo navedite kratak pregled budžeta kako biste pokazali koje troškove želite pokriti.
- Nije potrebno dostaviti detaljan budžet ili budžet razrađen po stavkama.
- Možete uključiti osnovne troškove, uključujući plate zaposlenih i operativne troškove.
- Troškovi povezani sa brigom, dobrobiti i pristupačnošću se ohrabruju.
- Ako ste kolektiv koji djeluje na volonterskoj osnovi, i dalje možete predvidjeti naknade ili kompenzaciju za vrijeme i angažman ljudi.
- Prilagodite kategorije tako da odražavaju vaše vlastite prakse organiziranja.

Obrazac za budžet

Budžetska linija	Opis	Iznos (EUR)
Troškovi za osoblje	Plate, naknade (stipendije), vrijeme za koordinaciju, voditelji projekata, organizatori u zajednici	
Projektne aktivnosti	Radionice, sastanci, događaji u zajednici, sesije političkog obrazovanja, istraživačke aktivnosti	
Troškovi brige i dobrobiti	Briga o djeci, ishrana, prostori za odmor, podrška dobrobiti, prakse brige u zajednici	
Troškovi pristupačnosti	Usmeni i pismeni prevod, titlovanje, asistenti za podršku pristupačnosti, prilagođeni materijali, podrška za putovanje	
Digitalni i tehnički troškovi	Softver, hardver, alati za sigurnu komunikaciju, hosting , održavanje	
Komunikacija	Dizajn, štampa, aktivnosti stupanja u kontakt i informiranja ljudi (outreach), ažuriranje web stranice, dokumentacija	
Putovanja i smještaj	Lokalna i međunarodna putovanja (ako je relevantno), smještaj, dnevnice	
Opći/operativni troškovi	Najam, režije, administrativna podrška, osiguranje, računovodstvo	
Nepredviđeni troškovi	Do 10% za neplanirane troškove	
UKUPNO		EUR

4. Dodatna dokumentacija – ovo nam pomaže da shvatimo način upravljanja vašom grupom (formalni ili neformalni)

Molimo priložite sve ili neke od sljedećih dokumenata:

- Zvaničnu kopiju registracijskih dokumenata ili bilo koje interne akte o upravljanju koje vaša organizacija ima.
- Jedan od sljedećih oblika finansijskih izvještaja (po mogućnosti na engleskom jeziku, ali prihvatamo i druge jezike)
 - Revidirani finansijski izvještaji (ne stariji od posljednje finansijske godine)
 - Finansijski izvještaji/izjave (ne stariji od posljednje finansijske godine)

Ukoliko zvanični finansijski izvještaji nisu dostupni, molimo dostavite bilo koju relevantnu finansijsku računovodstvenu dokumentaciju za period od posljednjih šest mjeseci do jedne godine.

Ako nemate nijedan od ovih dokumenata, na primjer, ako ste nova grupa koja se prijavljuje za finansiranje, molimo da nam se obratite putem emaila digitaljusticefund@weavingliberation.org kako bismo bolje shvatili vaš kontekst.

4. Često postavljana pitanja

O Fondu

Šta je Fond za digitalnu pravdu?

Fond za digitalnu pravdu je novi participativni fond za regrantiranje koji je uspostavila inicijativa Weaving Liberation. Podržava grupe koje se bave rasnom, antikastinskom, ekonomskom, okolišnom, transfeminističkom, queer i migrantskom pravdom i pravdom za osobe sa invaliditetom, kao i grupama koje se bave digitalnom pravdom, a djeluju na sjecištu tehnologije i pravde. Cilj Fonda je osigurati resurse grupama kako bi se suprotstavile sistemskim tehnološkim štetama te zamišljale i gradile oslobađajuće digitalne budućnosti.

Zašto ovaj fond postoji?

Trenutno u Evropi ne postoji fond posvećen podršci radu na tehnologiji i pravdi koji vode zajednice najviše pogođene tehnološkim štetama. Mnoge grupe koje obavljaju presudan rad u ovoj oblasti i dalje raspolažu ograničenim resursima ili su isključene iz tradicionalnih izvora finansiranja. Ovaj fond ima cilj da to promijeni tako što novac usmjerava direktno tim grupama i podržava njihove vizije, strategije i organiziranje. Inspiraciju smo pronašli u organizacijama poput Numun Fund, Dalan Fund i Black Feminist Fund, između ostalih. Za više informacija o Fondu, molimo posjetite našu web stranicu.

Odakle dolaze sredstva za Fond?

Zahvalni smo na podršci Ford Foundation, Luminate i Oak Foundation koje su osigurale resurse za ovaj pilot krug Fonda za digitalnu pravdu.

Uslovi za učešće

Ko se može prijaviti?

Pozivamo na prijavu registrirane i neregistrirane grupe, kolektive i nevladine organizacije. Prednost će imati grupe koje vode historijski isključene i marginalizirane zajednice.

Koje vrste rada su prihvatljive?

Finansiramo širok spektar organiziranja za digitalnu pravdu, uključujući, između ostalog:

- Izgradnju znanja i političko obrazovanje
- Umjetničke i kulturne intervencije
- Izgradnju koalicija i organiziranje među različitim pokretima
- Razvoj tehnoloških resursa i infrastruktura usmjerenih na zajednicu
- Organizacijsko jačanje i razvoj digitalnih kapaciteta

Postoje li kriteriji koje moramo ispuniti?

Da. Da biste se mogli prijaviti, potrebno je da ispunjavate SVE navedene kriterije:

- Djelujete prvenstveno u Evropi, a fokus vaših aktivnosti uključuje Evropu
- Bavite se organiziranjem u oblasti digitalne pravde
- Imate prosječan godišnji budžet manji od 500.000 EUR
- Imate najviše deset plaćenih zaposlenih osoba
- Vođeni ste zajednicom (što znači da su osobe najviše pogođene pitanjima kojima se bavite zastupljene u rukovodstvu, donošenju odluka i provedbi aktivnosti.)

Da li se pojedinci mogu prijaviti?

Ne. Ovaj fond je namijenjen isključivo radu koji se odvija unutar grupa, kolektiva i organizacija.

Možemo li se prijaviti zajedno sa drugom organizacijom?

Da. Zajedničke prijave se ohrabruju. Samo vodeća organizacija u okviru zajedničke prijave treba ispunjavati sve kriterije za učešće.

Šta podrazumijevate pod “djelovanjem u Evropi” i da “fokus aktivnosti” mora uključivati Evropu?

Namjera nam je podržati organiziranje na terenu u Evropi i/ili rad koji dovodi do promjena u Evropi. Pod “djelovanjem u Evropi” podrazumijevamo da se najmanje 50% vaše grupe nalazi u jednoj ili više država članica Vijeća Evrope. Kada je riječ o fokusu aktivnosti, svjesni smo da su brojna digitalna pitanja i izazovi globalni, te da se promjene u Evropi mogu ostvarivati kroz različite strategije, uključujući međunarodno ili transkontinentalno organiziranje pokreta koje u određenim aspektima može decentrirati Evropu. Ako saradujete ili gradite koalicije s grupama van Evrope na temama koje se također tiču Evrope, takav rad spada u obuhvat ovog fonda.

Šta ako je naš rad u Evropi povezan sa rješavanjem štetnih odnosa moći i praksi izvan Evrope? Da li takav rad ispunjava uslove?

Apsolutno. Pozivamo vas da podnesete prijave za aktivnosti na sjecištu tehnologije i pravde koje povezuju strategije za suočavanje sa strukturnim štetama i odnosima moći na međunarodnom nivou, npr. rad koji uključuje lokalno organiziranje u Evropi sa ciljem pružanja otpora štetnim političkim ideologijama iz drugih regija koje se šire ili omogućavaju putem tehnologije.

Finansiranje

Koliki iznos možemo tražiti?

Možete se prijaviti za iznos između 10.000 i 50.000 EUR.

Koliko dugo traje finansiranje?

Sredstva se mogu koristiti u periodu do dvije godine, između 2026. i 2028. godine.

Koliko je ukupno sredstava dostupno?

U prvom krugu Fond će raspodijeliti ukupno 500.000 EUR.

Proces prijave

Kako se prijaviti?

- Pročitajte paket informacija za prijavu
- Pristupite webinaru (nije obavezno)
- Registrirajte se na platformi za grantove inicijative Weaving Liberation
- Podnesite prijavu putem platforme

Nakon što primimo vašu prijavu, mi poduzimamo sljedeće korake:

- Tim inicijative Weaving Liberation provjerava da li su ispunjeni uslovi za učešće
- Peer Circle grupa pravi uži izbor
- Peer Circle grupa donosi konačnu odluku
- Inicijativa Weaving Liberation obavještava podnosiocima prijava o odlukama

Koje procese dubinske provjere (due diligence) primjenjujete?

Kao neprofitna organizacija koja djeluje pod okriljem Digital Freedom Fund-a u Nizozemskoj, zakonski smo obavezni provoditi procese dubinske provjere kako bismo potvrdili da podnosioci prijava mogu primiti sredstva, upravljati njima i provoditi aktivnosti u skladu sa misijom Fonda za digitalnu pravdu. Cilj nam je da vam u ovom procesu nametnemo što manji administrativni teret.

U prijavi ćete primijetiti da tražimo određene informacije o organizaciji i njenom rukovodstvu. Također tražimo da priložite upravljačke dokumente, finansijsku dokumentaciju i reference.

Nastojali smo ovaj proces prijave maksimalno pojednostaviti, uz istovremeno poštivanje zakonskih obaveza. Ako vam je potrebna podrška, pozivamo vas da se pridružite jednom od naših webinaru ili da kontaktirate tim putem emaila digitaljusticefund@weavingliberation.org

Koji su zahtjevi u pogledu izvještavanja o grantovima?

U okviru naše opredijeljenosti za promjenu odnosa moći u procesu dodjele grantova, namjera nam je imati pojednostavljen proces izvještavanja na kraju perioda finansiranja, na primjer dostavljanjem osnovnih finansijskih podataka o načinu utroška sredstava granta. O tome ćemo se dogovoriti na početku trajanja granta.

Otvoreni smo za zajednički proces učenja sa korisnicima grantova, u kojem oni imaju priliku odlučivati o pitanjima i refleksijama koje su za njih relevantne ili ključne. Također će postojati mogućnost da korisnici daju povratne informacije o praksama i procesima koje mi primjenjujemo kao davalac sredstava.

Koji su najvažniji rokovi?

- **20. maja 2026, 12:30 CET** – Neobavezni webinar na kojem možete saznati više o fondu.
- **Nedjelja 24. maj 2026., 23:59 CET** – Rok za registraciju vaše organizacije na platformi za grantove. Ne morate završiti popunjavanje prijave do ovog datuma.
- **27. maja 2026, 16:30 CET** – Neobavezni webinar na kojem možete saznati više o fondu.
- **Nedjelja 21. juni 2026., 23:59 CET** – Rok za dostavu popunjene prijave na platformi za grantove.
- **Početak avgusta** – Email od inicijative Weaving Liberation kojim se podnosioci prijave koji su ušli u uži izbor obavještavaju o ishodu njihove prijave.

Možemo li podnijeti audio prijavu?

Da. Ako vam više odgovara ili imate potrebe pristupačnosti koje zahtijevaju podnošenje prijave u audio formatu, možete kontaktirati tim putem emaila digitaljusticefund@weavingliberation.org kako biste to dogovorili.

Ko može pristupiti našim podacima i vidjeti ih?

Prijava se podnosi putem platforme Hypha, platforme koja je otvorenog koda i služi za upravljanje prijavama. Platforma je samostalno hostovana na [Greenhost Virtual Private Server](#) u Nizozemskoj. Audio prijave će se dostavljati putem sigurnog prenosa, u dogovoru sa timom inicijative Weaving Liberation. Vaši podaci se neće čuvati bez vašeg izričitog pristanka nakon završetka ovog ciklusa dodjele grantova, a do tada će biti pohranjeni na sigurnoj platformi. Molimo vas da u fazi prijave ne dijelite osjetljive podatke koji bi mogli ugroziti vas ili vašu grupu. Ako imate bilo kakve bojazni, slobodno nas kontaktirajte putem emaila digitaljusticefund@weavingliberation.org

Odlučivanje

Ko odlučuje o finansiranju?

Sve odluke o finansiranju donosi naša Peer Circle grupa – osobe koje stoje uz one na koje tehnologija najviše utiče i blisko djeluju s njima i koje posjeduju iskustvo i znanje o sistemskim štetama, kao i o oslobađajućim znanjima i praksama. Oni i one su učestvovali u oblikovanju obima, procesa i pristupa našeg participativnog modela finansiranja.

Kada ćemo dobiti odgovor?

Ako ne uđete u uži izbor za završnu fazu procesa, o tome ćemo vas obavijestiti do kraja jula. Podnosioci prijave koji uđu u uži izbor bit će obaviješteni o konačnoj odluci početkom avgusta.

Hoćemo li dobiti povratne informacije?

Mi smo mali tim i, s obzirom na naše kapacitete, vjerovatno nećemo biti u mogućnosti dostaviti individualizirane povratne informacije svim podnosiocima prijave za Fond. Međutim, posvećeni smo tome da pružimo povratne informacije svim podnosiocima prijave koji uđu u uži izbor, ukoliko ih zatraže.

Podrška

Šta ako nam je potrebna pomoć pri prijavi?

Želimo se pobrinuti da svi imaju odgovarajuću podršku, u skladu sa kapacitetima našeg tima. Ohrabrujemo vas da:

- Prisustvujete našem webinaru
- Kontaktirate tim ako imate pitanja ili potrebe povezane sa pristupačnošću na email digitaljusticefund@weavingliberation.org
- Konsultirate cijeli paket informacija za prijave i često postavljana pitanja

Da li će biti dostupni prevodi na druge jezike?

Paket informacija za prijave dostupan je za preuzimanje i na drugim jezicima osim engleskog, a to su arapski, bosanski, francuski, njemački, italijanski, španski, i portugalski.

Mogu li se prijaviti za Fond na nekom drugom jeziku osim engleskog?

S obzirom na naše ograničene kapacitete, u ovom krugu prijava za Fond tražimo da one budu dostavljene na engleskom jeziku, bilo putem platforme za grantove ili u audio formatu. Pozivamo vas da, ukoliko je potrebno, koristite alate za prevođenje prilikom popunjavanja prijavnog obrasca te da to naznačite u prijavi. Ako želite dodatno razgovarati o ovome, slobodno nas kontaktirajte putem emaila digitaljusticefund@weavingliberation.org.

Šta ako ovdje nema odgovora na moje pitanje?

Molimo kontaktirajte tim inicijative Weaving Liberation direktno putem emaila digitaljusticefund@weavingliberation.org. Rado ćemo vam pružiti podršku.